

Aningaasanik ikisilluni pinnguaatinut akileraarut pillugu Inatsisartut inatsisaata allanngortinneqarnissaanik siunnersuut

Saqqummiussinermi oqaaseqaatit

(Aningaasaqarnermut Naalakkersuisoq)

Siullermeerutaasumik suliarineqarnera

Naalakkersuisut sinnerlugit aningaasanik ikisilluni pinnguaatinut akileraarut pillugu Inatsisartut inatsisaata allanngortinnissaanik siunnersuut matumuuna saqqummiutissavara.

Inatsisissatut siunnersuutip aningaasanik ikisilluni pinnguaatitigut sinneqartoorutit ilaasa annertunerusut Nunap karsianut akitsuutitut isertinnerisigut nunap karsianut isertitat amerleriarnissaat qulakkiissavaa.

Siunnersuutigineqarpoq eqquiffiusartutut pinnguaatinut akitsuut 5.000 koruuninik qaffanneqassasoq.

Aningaasanik ikisilluni eqquiffiusarluni pinnguaammut siullermut akitsuut taamaasilluni 64.000 koruuninut allanngortinneqassaaq. Aningaasanik ikisilluni eqquiffiusarluni pinnguaammut tullermut akitsuut 70.000 koruuninut allanngortinneqassaaq pinnguaatillu sinnerinut tamanut 76.000 koruuninut.

Naalakkersuisut naatsorsuutigaat aningaasanik ikisilluni pinnguaatinut akitsuutit qaffatat ukiumut 900.000 koruunit misigisaat isertissagaat.

Taamatut oqaaseqarlunga Naalakkersuisut sinnerlugit siunnersuut Inatsisartunut suliarisassanngortippara aammalu Akileraartarnermut Akitsuusiinermullu Ataatsimiitaliami suliarineqareernerani aappassaaneerutaasumik suliarineqartussanngorlugu.